

17. ágúst 2022

Starfsskýrsla 2021

Skýrsla Breiðafjarðarnefndar til
umhverfis-, orku- og loftslagsráðherra



BREIÐAFJARÐARNEFND

Efnisyfirlit

Inngangur	2
Aðsetur Breiðafjarðarnefndar	2
Skipan Breiðafjarðarnefndar	2
Starfsmaður Breiðafjarðarnefndar	3
Fundir Breiðafjarðarnefndar	3
Kostnaður við störf nefndarinnar	3
Starfsemi á árinu 2021	5
Dagleg starfsemi	5
Umsögn um erindi	5
Heimasíða Breiðafjarðarnefndar	5
Bæklingar Breiðafjarðarnefndar	5
Vettvangsferð Breiðafjarðarnefndar	5
.....	6
Áherslumál	6
Framtíð Breiðafjarðar	6
Landvarsla við Breiðafjörð	8
Náttúru- og menningarminjar	9
Örnefnaskráning	9
Lokaorð	9

Inngangur

Breiðafjarðarnefnd starfar í samræmi við lög nr. 54/1995 um vernd Breiðafjarðar, en tilgangur laganna er að stuðla að verndun Breiðafjarðar, einkum landslags, jarðmyndana, lífríkis og menningarminja. Hlutverk nefndarinnar er að vera ráðherra til ráðgjafar um allt það er lýtur að framkvæmd laga um vernd Breiðafjarðar.

Frá því að lög um Breiðafjörð voru samþykkt á Alþingi hafa orðið nokkrar breytingar á lögnum samhliða breytingum á öðrum lögum sem þau tengjast en lögin eru jafnóðum uppfærð á heimasíðu Alþingis, sbr. <https://www.althingi.is/lagas/146a/1995054.html>.

Aðsetur Breiðafjarðarnefndar

Skrifstofa Breiðafjarðarnefndar er, samkvæmt ákvörðun ráðherra, vísuð hjá Náttúrustofu Vesturlands, Hafnargötu 3 í Stykkishólmi og hefur svo verið frá árinu 2001.

Skipan Breiðafjarðarnefndar

Umhverfis-, orku og loftslagsráðherra, sem fer með stjórn mála er varða vernd Breiðafjarðar, skipar fulltrúa í Breiðafjarðarnefnd. Breiðafjarðarnefnd skal árlega gefa ráðherra skýrslu um störf sín. Um skipan Breiðafjarðarnefndar er fjallað í 4 gr. laganna en þar segir m.a.: „Í nefndinni eiga sæti sjö menn, sem ráðherra skipar til fjögurra ára í senn sem hér segir: Sveitarfélög sem liggja að Breiðafirði tilnefna fjóra fulltrúa á þann hátt sem ráðherra ákveður í reglugerð, Náttúrufræðistofnun Íslands og náttúrustofur á Vesturlandi og Vestfjörðum einn sameiginlega og einn er tilnefndur af Minjastofnun Íslands. Ráðherra skipar einn mann í nefndina án tilnefningar og skal hann vera formaður. Varamenn skulu skipaðir með sama hætti.“

Á árinu var skipað í nýja nefnd en skipunartími fráfarandi nefndar rann út þann 9. júní 2021. Í henni sátu eftirtaldir:

- Erla Friðriksdóttir, formaður, skipuð án tilnefningar, til vara Guðríður Þorvarðardóttir.
- Karl Kristjánsson, tilnefndur af Reykhólahreppi, til vara Rebekka Eiríksdóttir.
- Arnheiður Jónsdóttir tilnefnd af Vesturbyggð, til vara Úlfar B. Thoroddsen.
- Eyjólfur Ingvi Bjarnason, tilnefndur af Dalabyggð, til vara Bjarnheiður Jóhannsdóttir.
- Ragnhildur Sigurðardóttir, tilnefnd sameiginlega af Stykkishólmsbæ, Helgafellssveit, Grundarfjarðarbæ og Snæfellsbæ, til vara Sturla Böðvarsson.
- Magnús A. Sigurðsson, tilnefndur af Minjastofnun Íslands, til vara Agnes Stefánsdóttir.
- Róbert A. Stefánsson, tilnefndur af Náttúrufræðistofnun Íslands, Náttúrustofu Vestfjarða og Náttúrustofu Vesturlands, til vara Hulda Birna Albertsdóttir.

Sitjandi nefnd var skipuð af ráðherra þann 4. ágúst 2021. Í henni sitja eftirtaldir:

- Erla Friðriksdóttir, formaður, skipuð án tilnefningar, til vara Guðríður Þorvarðardóttir.
- Karl Kristjánsson, tilnefndur af Reykhólahreppi, til vara Rebekka Eiríksdóttir.
- Arnheiður Jónsdóttir tilnefnd af Vesturbyggð, til vara Ólafur Helgi Haraldsson.
- Valdís Einarsdóttir, tilnefnd af Dalabyggð, til vara Eyjólfur Ingvi Bjarnason.
- Arnar Kristjánsson, tilnefndur sameiginlega af Stykkishólmsbæ, Helgafellssveit, Grundarfjarðarbæ og Snæfellsbæ, til vara Steinunn I. Magnúsdóttir.

- Magnús A. Sigurðsson, tilnefndur af Minjastofnun Íslands, til vara Ásta Hermannsdóttir.
- Sigurður Halldór Árnason, tilnefndur af Náttúrufræðistofnun Íslands, Náttúrustofu Vestfjarða og Náttúrustofu Vesturlands, til vara Sunna Björk Ragnarsdóttir.

Starfsmaður Breiðafjarðarnefndar

Theódóra Matthíasdóttir, starfsmaður Náttúrustofu Vesturlands, gegndi starfi ritara Breiðafjarðarnefndar út september árið 2021 í 25% starfshlutfalli. Sérstakur samningur var gerður við Náttúrustofu Vesturlands um 35% starfshlutfall aukalega í janúar 2021 við að ganga frá samantekt nefndarinnar og tillögum hennar um framtíð Breiðafjarðar. Anna Hallgrímsdóttir tók við starfi ritara Breiðafjarðarnefndar 1. október 2021 í 25% starfshlutfalli.


Fundir Breiðafjarðarnefndar

Breiðafjarðarnefnd hélt þrettán nefndarfundi á árinu 2021. Nefndin fundaði einnig með umhverfis- og auðlindaráðherra um tillögur sínar um framtíð Breiðafjarðar. Allir 13 fundir nefndarinnar árið 2021 fóru fram í gegnum fjarfundabúnaðinn Teams. Einn fundur var haldinn bæði í gegnum fjarfundabúnað og á staðnum í Stykkishólmi. Fundafyrirkomulagið á Teams hefur reynst vel á tímum heimsfaraldurs en framvegis mun nefndin reyna að hittast reglulega í eigin persónu samhliða Teams fundum.

Um fjöllum mála og afgreiðslur nefndarinnar er að finna í fundargerðum sem birtar hafa verið á heimasíðu nefndarinnar, www.breidafjardur.is.

Kostnaður við störf nefndarinnar

Fjárveitingar til Breiðafjarðarnefndar árið 2021 skv. fjárlögum námu 10 milljónir kr. Myndin hér að neðan sýnir þróun fjárveitinga til Breiðafjarðarnefndar til ársins 2021, leiðrétt fyrir breytingum á launavísitölu. Samkvæmt þeim útreikningum hefur verðgildi framlagsins dregist saman um 52% á síðustu 18 árum.



Í töflunni hér að neðan má sjá yfirlit yfir ráðstöfun fjárveitinga nefndarinnar árið 2021.

Fjármál Breiðafjarðarnefndar 2021	
Rekstrartekjur	Bókað 2021
Ríkissjóður samkvæmt fjárlögum.....	10.300.000
Flutt frá fyrra ári.....	1.080.000
Tekjur alls	11.380.000
Rekstrargjöld	Bókað 2021
Rekstur nefndar	
Nefndalaun	382.806
Launatengd gjöld	58.535
Náttúrustofa skv. þjónustusamningi	9.612.073
Sími, internet og lén.....	32.685
Tölvuþjónusta.....	4.782
Annar kostnaður.....	63.724
SAMTALS	10.154.605
Fundagjöld	
Akstur	133.572
Dvalarkostnaður	11.900
Veitingar.....	78.482
Vettvangsferð.....	7.840
SAMTALS	231.794
Kostnaður við rannsóknir og verkefni:	
Bæklingagerð.....	32.990
Prentun bæklinga.....	200.373
Flutningur bæklinga.....	9.523
Annar kostnaður.....	33.169
SAMTALS	276.055
Rekstrargjöld alls	10.662.454
Rekstrarniðurstaða	2021
Tekjur samtals:	11.380.000
Gjöld samtals:	10.662.454
Afkoma	717.546

Starfsemi á árinu 2021

Hér að neðan er gerð stutt grein fyrir þeim verkefnum sem Breiðafjarðarnefnd vann að árið 2021.

Dagleg starfsemi

Umsögn um erindi

Á árinu 2021 fjallaði Breiðafjarðarnefnd, sem fyrr, um erindi sem nefndinni bárust. Flest voru erindi vegna skipulagsmála og umsagnir um frumvörp og reglugerðir. Varðandi afgreiðslu innsendra erinda er vísað í fundargerðir á heimasíðu Breiðafjarðarnefndar¹.

Heimasíða Breiðafjarðarnefndar

Breiðafjarðarnefnd heldur úti heimasíðu á slóðinni www.breidafjordur.is. Þar má m.a. nálgast fundargerðir og starfsskýrslur nefndarinnar, verndaráætlun og framkvæmdaáætlun auk annarra skýrslna sem nefndin hefur styrkt og sem tengjast náttúru og menningu Breiðafjarðar. Á síðunni er einnig að finna undirsíðu tileinkaða „framtið Breiðafjarðar“ en þangað hafa verið settar inn allar upplýsingar varðandi vinnu nefndarinnar um framtið Breiðafjarðar.

Bæklingar Breiðafjarðarnefndar

Breiðafjarðarnefnd hefur gefið út bæklingana „Breiðafjörður - Náttúra og saga“, „Fuglalíf á Breiðafirði“, „Hlunnindanýting á Breiðafirði“ og „Öryggi og umgengni á Breiðafirði“ á bæði íslensku og ensku. Bæklingunum er m.a. dreift án endurgjalds til ferðaþjónustuaðila við Breiðafjörð auk þess sem þeir eru aðgengilegir á heimasíðu Breiðafjarðarnefndar².

Vettvangsferð Breiðafjarðarnefndar

Hefð er fyrir að Breiðafjarðarnefnd fari í eina vettvangsferð um verndarsvæðið á sumri hverju, einkum í þeim tilgangi að veita nefndarmönnum betri innsýn í náttúru og menningu svæðisins. Nefndin hafði áætlað vettvangsferð í Flatey þann 11. ágúst en vegna heimsfaraldurs Covid-19 varð að aflýsa þeirri ferð. Það varð þó úr að Erla Friðriksdóttir, formaður nefndarinnar, fór samferða umhverfis- og auðlindaráðherra og hans föruneysi í Flatey þann 11. ágúst. Tilgangur ferðarinnar var sér í lagi undirritun á auglýsingu um stækkun friðlandsins í Flatey, sem unnið hefur verið að síðastliðin ár.

¹ www.breidafjordur.is/breidafjardarnefnd/fundargerdir

² <http://www.breidafjordur.is/wp-content/uploads/2021/04/baeklingur-2019.pdf>



Umhverfis- og auðlindaráðherra, Guðmundur Ingi Guðbrandsson, ásamt formanni Breiðafjarðarnefndar, starfsfólki umhverfis- og auðlindaráðuneytis og Umhverfisstofnunar, sem og fulltrúum ábúenda í eygni og Reykhólahrepps í Flatey þann 11. ágúst 2021.

Áherslumál

Framtíð Breiðafjarðar

Þann 18. janúar 2021 sendi Breiðafjarðarnefnd umhverfis- og auðlindaráðherra erindi með tillögum sínum um framtíð verndar, nýtingar og stjórnunar verndarsvæðis Breiðafjarðar. Skýrslan ber nafnið „Framtíð Breiðafjarðar - Samantekt og niðurstöður Breiðafjarðarnefndar“ og er aðgengileg á heimasíðu Breiðafjarðarnefndar. Markmið nefndarinnar með tillögunum er að varðveita náttúru og menningu svæðisins samhliða því að styrkja enn frekar samfélögin umhverfis fjörðinn, þar á meðal atvinnulíf.

Í tillögum sínum til ráðherra leggur Breiðafjarðarnefnd áherslu á að endurskoða þurfi lög um vernd Breiðafjarðar og það verði gert sem fyrst. Lögin eru orðin ríflega 25 ára gömul og hafa ekki tekið efnislegum breytingum síðan þau voru sett. Um leið verði horft sérstaklega til þess möguleika að stækka svæðið svo það nái yfir allan Breiðafjörð frá Bjargtöngum á Vestfjörðum að Öndverðarnesi á Snæfellsnesi. Nefndin leggur einnig til að Breiðafjörður verði skráður á lista yfir Ramsarsvæði, en Ramsarsamningurinn er alþjóðlegur samningur um verndun votlendis, þar á meðal strandsvæða niður á

6 metra dýpi. Nefndin óskar að auki eftir því að ráðherra hefji vinnu við að skoða og kynna á næstu misserum kosti og galla stofnunar þjóðgarðs á Breiðafirði, á hluta svæðisins eða í heild, og skráningar svæðisins á heimsminjaskrá UNESCO.

Tillögur nefndarinnar byggja á ítarlegri upplýsingaöflun og samráðsvinnu sem nefndin vann að á tveggja ára tímabili. Nefndin stóð meðal annars fyrir opnu málþingi um framtíð Breiðafjarðar í Tjarnarlundi í Dalabyggð, hélt fjóra opna íbúafundi við fjörðinn og fundaði með fulltrúum hverrar sveitarstjórnar fyrir sig. Á þessum fundum fengu nefndarmenn að heyra mismunandi sjónarmið sveitarstjórna, hagsmunaaðila og almennings, sem skýrði betur hvaða leiðir gætu komið til greina og hvar helstu ágreiningsefnin lægju.

Með þessu vildi Breiðafjarðarnefnd hefja samtalið og stíga fyrsta skrefið í átt að mótun framtíðar Breiðafjarðar.

Í nóvember 2020 tók Breiðafjarðarnefnd niðurstöður saman og sendi sveitarfélögum við fjörðinn til formlegrar umsagnar. Samantektin var auk þess birt á heimasíðu nefndarinnar og áhugasömum gefinn kostur á að senda inn athugasemdir. Breiðafjarðarnefnd lagði svo lokahönd á niðurstöður sínar að teknu tilliti til umsagna, þá sérstaklega umsagna sveitarfélaga. Samantektin fylgdi erindi nefndarinnar til ráðherra máli hennar til stuðnings.

Umsagnir bárust frá öllum sjö sveitarfélögum við fjörðinn. Umagnirnar voru langflestar jákvæðar og augljóst er að sveitarfélögin eru sammála Breiðafjarðarnefnd um að mikilvægt sé að ráðast í endurskoðun á lögum um vernd Breiðafjarðar. Hvað varðar aðrar leiðir, sem nefndin leggur til, er almenn afstaða sveitarfélaganna sú að mikilvægt sé að kanna vel og kynna enn betur kosti og galla þeirra fyrir íbúum og hagsmunaaðilum svo að sem ríkust sátt náist um málið. Þess ber þó að geta að umsögn Stykkishólmsbæjar var ólík umsögnum hinna sveitarfélaganna og virtist af henni mega ráða að sveitarfélagið sé ekki tilbúið í samstarf um frekari verndun.

Umsagnir bárust einnig frá fulltrúum félagasamtaka, útgerðarféлага, landeigenda og frá öðrum áhugasömum um framtíð svæðisins og voru ýmist jákvæðar eða neikvæðar gagnvart hugmyndum nefndarinnar. Hægt er að kynna sér einstakar umsagnir í viðauka skýrslu nefndarinnar.

Breiðafjarðarnefnd leggur, eins og sveitarfélögin, höfuðáherslu á að í áframhaldandi vinnu verði þátttaka sveitarstjórna, íbúa, landeigenda, atvinnulífs og annarra hagsmunaaðila tryggð. Nefndin telur líka miklu máli skipta að fulltrúar svæðisbundinna og landsþekjandi fagstofnana á sviði náttúru- og menningarminja verði hafðir með í mótun framtíðar Breiðafjarðar og að áfram verði lögð rík áhersla á fræðslu, samtal og samráð. Við frekari mótun á framtíð Breiðafjarðar þarf að gæta að samræmingu á vernd og nýtingu og að verndaraðgerðir takmarki ekki sjálfbæra nýtingu á auðlindum.

Eftir að Breiðafjarðarnefnd skilaði skýrslunni til ráðherra í janúar 2021 skipaði ráðuneytið stýrihóp sem falið var að stýra vinnu við nánari greiningu á verndargildi svæðisins og áhrifum þess, tækifærum og ógnunum, á samfélag, byggð og atvinnulíf. Greining stýrihópsins á að leiða til tillögu um framtíð verndarsvæðis Breiðafjarðar. Haustið 2021 var auglýst staða verkefnastjóra sem vinnur með stýrihópnum. Hann mun starfa hjá Náttúrustofu Vesturlands og mun hefja störf í ársbyrjun 2022.

Landvarsla við Breiðafjörð

Árið 2019 var í fyrsta sinn viðhöfð landvarsla við verndarsvæðið Breiðafjörð. Niðurstaða þess verkefnis var sú að rétt væri að festa í sessi og efla landvörslu á verndarsvæði Breiðafjarðar, sér í lagi yfir sumartímann. Í ljósi þessara niðurstaðna hvatti Breiðafjarðarnefnd umhverfis- og auðlindaráðherra og Umhverfisstofnun til þess að halda þessu góða starfi áfram og tryggja fjármagn í landvörslu á verndarsvæði Breiðafjarðar.

Vorið 2020 úthlutaði umhverfis- og auðlindaráðuneytið aftur fjármagni til landvörslu á svæðinu sem nægði til sextán vikna landvörslu. Umhverfisstofnun sá um skipulagningu og framkvæmd verkefnisins í samstarfi við Breiðafjarðarnefnd. Sveitarfélögum á verndarsvæðinu var tilkynnt um að landvarsla væri fyrirhuguð og voru þrír landverðir ráðnir til starfa, mislengi eftir þörfum hvers svæðis fyrir sig. Umhverfisstofnun gaf út skýrslu með niðurstöðum landvörslunnar árið 2020 í febrúar 2021. Skýrslan er aðgengileg á heimasíðum Breiðafjarðarnefndar og Umhverfisstofnunar.

Umhverfis- og auðlindaráðuneytið úthlutaði í þriðja sinn fjármagni til landvörslu á svæðinu árið 2021. Samtals dugði það til að halda úti 16 landvarðavikum á Breiðafjarðarsvæðinu yfir sumarið. Megináhersla var lögð á fræðsluferðir um svæðið, fræðslu ferðamanna og samtal við landeigendur og lykilaðila á svæðinu.

- Landvörður I var við störf á norðanverðum Breiðafirði í fimm vikur frá 1. júlí – 31. júlí.
- Landvörður II var við störf í Flatey og á Snæfellsnesi í fimm vikur frá 28. júní – 2. ágúst.
- Landvörður III var við störf á sunnanverðum Breiðafirði í sex vikur frá 28. júní – 9. ágúst.

Landverðir stóðu fyrir fræðsluferðum á svæðinu og töluðu við ferðamenn um sérkenni Breiðafjarðarsvæðisins. Í Flatey talaði landvörðurinn við fleiri en 200 ferðamenn á fjórum vikum og fræddi þá um náttúru eyjarinnar. Hann telur mikla þörf fyrir landvörslu í Flatey þar sem margir ferðamenn koma í fuglaskoðun og mikilvægt er að fræða þá um rétta umgengni á verndarsvæðinu. Tilvalið er að stunda landvörslu í Flatey þar sem ferðamannastraumur er fyrirsjáanlegur út frá ferðum Baldurs og eyjan er tiltölulega lítil. Stærð eyjarinnar og staðsetning fuglaskoðunarsvæða hjálpa við að landvörður geti tryggt eftirlit með öllu verndarsvæðinu. Fjöldi ferðamanna var frekar lítill árið 2021 þar sem covid heimsfaraldurinn var áhrifamikill í ferðaþjónustu.

Landverðir ræddu við lykilfólk hjá sveitarfélögum, kynntu fyrir þeim markmið og tilgang landvörslu og lögðu áherslu á að hún sé líka fyrir íbúa. Á ferðum sínum um svæðið töluðu landverðir við landeigendur og könnuðu afstöðu þeirra gagnvart ferðamennsku og fræðslu á svæðinu. Einnig var reynt að finna út hvernig best væri að bera sig að til þess að landeigendur yrðu fyrir sem minnstu ónæði af ferðamennsku.

Auk þessara áherslna sinntu landverðir hefðbundnum skyldum eftir því sem við átti, auk þess að vinna að stefnumótun vegna framtíðarlandvörslu. Við skipulagningu starfanna var lögð rík áhersla á að landverðir öfluðu sér upplýsinga og kæmu með tillögur að úrbótum, einkum með það fyrir augum að svara þeim spurningum sem ósvarað var eftir landvörsluna árið á undan.

Í stuttu máli er niðurstaða verkefnisins 2021 sú að tilefni sé til að halda landvörslu við fjörðinn áfram, sér í lagi í Flatey.

Breiðafjarðarnefnd fagnar því að fjármagn hafi verið sett í verkefnið síðastliðin þrjú ár og telur reynsluna sýna að full þörf hafi verið á. Breiðafjarðarnefnd hvetur umhverfis- og auðlindaráðherra til þess að festa fjárveitingar til landvörslu við Breiðafjörð í sessi til framtíðar og að ákvörðun um slíkt liggi fyrir með góðum fyrirvara, til að auðvelda undirbúning og útfærslu verkefnisins og skila enn árangursríkari landvörslu.

Náttúru- og menningarminjar

Örnefnaskráning

Breiðafjarðarnefnd hefur um árabíl tekið þátt í örnefnaskráningu á verndarsvæðinu. Nefndin telur mikilvægt að þeirri skráningu verði haldið áfram. Í lok árs 2019 gerði Breiðafjarðarnefnd samning við Náttúrufræðistofnun Íslands um örnefnaskráningar á Breiðafirði. Verkefnið felst í skráningu örnefna eyja, skerja og flæðiskerja á Breiðafirði. Stór hluti verkefnisins snýr að því að hafa samband við heimamenn og aðra þá sem þekkja til örnefna á Breiðafirði, bæði til að leita uppi örnefni og staðfesta þau. Þannig er hægt að staðfesta áður skráð örnefni. Við lok árs 2020 sendi Náttúrufræðistofnun Íslands upplýsingar um örnefni á Breiðafirði til Landmælinga Íslands, eins og samningurinn sagði til um. Þorvaldur Þór Björnsson sá um að safna örnefnunum og Anette Theresia Meier sá um landupplýsingar, þ.m.t. gerð korta. Árið 2020 skiluðu þau inn 2.158 örnefnum, bæði nýjum skráningum og leiðréttingum á örnefnum. Vinnan hélt áfram á almanaksárinu 2021. Þorvaldur safnaði fleiri örnefnum og kláraði örnefnaskráningu fram að bænum Stað í Reykhólahreppi. Ætlunin er að halda verkefninu áfram á næsta ári með söfnun örnefna frá Reykhólum að Látrabjargi. Verkáætlun gerir ráð fyrir að verkefninu ljúki fyrir árslok 2024.

Lokaorð

Í byrjun árs 2021 skilaði Breiðafjarðarnefnd skýrslu um Framtíð Breiðafjarðar til umhverfis- og auðlindaráðherra. Í kjölfarið var ákveðið að skipa stýrihóp um framtíð Breiðafjarðar og óskaði ráðuneytið eftir tilnefningum. Skipun hópsins var ekki lokið við árslok 2021.

Ný Breiðafjarðarnefnd var skipuð af ráðherra þann 4. ágúst 2021 og hélt sinn fyrsta fund 21. september 2021. Á þessum fundi tilnefndi Breiðafjarðarnefnd Erlu Friðriksdóttir, formann Breiðafjarðarnefndar, í stýrihópinn um framtíð Breiðafjarðar.

Theódóra Matthíasdóttir lét af störfum sem starfsmaður Breiðafjarðarnefndar í október og þakkar nefndin fyrir framlag hennar undanfarin ár.

Breiðafjarðarnefnd ítrekar að samtalið um framtíð Breiðafjarðar er enn í mótun. Stýrihópurinn mun leggja línur varðandi verndun Breiðafjarðar til framtíðar en sú vinna byrjar ekki fyrir árið 2022. Nefndin telur mikilvægt að næstu skref í mótun framtíðar Breiðafjarðar feli í sér vel útfærða fræðslu og ítarlegt samráð um málið svo skoðanir og afstaða byggji á faglegum forsendum. Stýrihópurinn um vernd Breiðafjarðar er góð leið til að halda áfram með slíkt samráð.

Nefndin er þakklát fyrir þátttöku íbúa, sveitarfélaga og annarra hlutaðeigandi í mótun framtíðar Breiðafjarðar á síðustu misserum.

Óski ráðherra eftir frekari upplýsingum um störf Breiðafjarðarnefndar á árinu 2021 verða þær að sjálfsögðu veittar.

Erla Friðriksdóttir, formaður

f.h. Breiðafjarðarnefndar

